

Sumáriu Kazu

Tribunál Judisiál Primeira Instáncia Suai

Fevereiru 2025

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Suai

1. Totál kazu ne'ebé JSMP monitoriza : 14

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	5
Artigu 177 KP	Abuzu seksuál ba menór	1
Artigu 171 KP	Koasaun seksuál	3
Artigu 154 KP	Maus-tratus kónjuje	1
Artigu 179 KP	Abuzu seksuál ba ema ne'ebé labele rejiste	1
Artigu 145 KP	Ofensa ba integridade física simples	1
Artigu 258 KP no 218	Danu simples no krime espésie ameasada ka ho perigu atu hotu	1
Artigu 316 KP	Kontrabandu	1
Totál		14

2. Totál desizaun ne'ebé JSMP monitoriza:11

Tipu pena	Artigu	Númeru
Pena multa	67 KP	4
Pena prizaun	66 KP	3
Suspensaun ba prizaun nia ezekusaun	68 KP	1
Omologa pedidu dezisténsia keixa	262 KPP	1
Absolve		2
Totál		11

2. Totál kazu sira ne'ebé kontinua prosesu tuir JSMP nia monitorizasaun: 3

B. Deskrisaun sumáriu ba desizaun kazu sira ne'ebé JSMP monitoriza

1. Krime ofensa ba integridade fízika simples ho natureza violénsia doméstika

Nú. Prosesu : 0106/24.PDSUA
Kompozisaun Tribunál : Singulár
Juis : Dr. Nasson Armindo Marques Doutel Sarmento
Prokuradór : Dr. Simeão Brites Seixas
Defeza : Dr. Albano Maia
Desizaun : Pena multa US\$ 30.00

Iha 05 Feveireiru 2025, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples ho natureza VD ne'ebé envolve arguidu SA hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 13 Agostu 2024, iha oras tuku 22:00 kalan, arguidu foti ai-sar nia kain hodi baku dala ida iha ofendida nia kotuk laran, rezulta ai-sar nia kain tohar hodi kona iha ofendida nia ulun rezulta bubu no kanek. Antes ne'e, arguidu atu ba festa maibé ofendida la autoriza ho nune'e arguidu ho ofendida diskute malu no mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arguidu deklarata katak foin mak mai hatan iha tribunál, arrepende ninia hahalok no deklarata katak antes ne'e nunca halo agresaun hasoru ofendida no depoisde akontesimentu to'o agora la baku ona ofendida.

Alende ne'e, ofendida kontinua konfirma faktu sira hotu iha akuzasaun, ofendida deklarata katak depoisde akontesimentu liu oras balun di'ak malu kedas no to'o agora arguidu labaku ona ofendida no ofendida mós perdua ona arguidu.

Alegasaun final

Prokurador haktuir katak, iha julgamentu arguidu konfesa no ofendida konfirma faktu hotu iha akuzasaun, prokurador haree katak kazu la'en baku feen ne'e aas liu, tanba ne'e husu ba tribunál atu halo prevensaun ba krime refere atu labele akontese tan iha futuro, nune'e husu ba tribunál atu kondena arguidu ho pena multa.

Alende ne'e, defeza haktuir katak arguidu konfesa, foin primeiravés komete krime hasoru lezada, arrepende ninia hahalok, nune'e husu ba tribunál atu kondena arguidu ho pena multa.

Desizaun

Depoisde avalia faktu sira ne'ebé produs durante julgamentu, tribunál konsidera faktu hotu iha akuzasaun prokurador nian provadu hotu.

Bazeia ba faktu provadu hirak ne'e hotu no tetu mós ho sirkunstánsia hotu-hotu ne'ebé haleu krime ne'e, nune'e tribunál koklui prosesu ne'e no kondena arguidu ho pena multa US\$30.00, ne'ebé kada loron arguidu sei selu 0,50 sentavus, durante loron 60, tribunál mós fiksa pena alternativa durante loron 40 prizaun. Bainhira arguidu la kumpri pena multa refere.

2. Krime danu simples no krime espésie ameasada ka ho perigu atu hotu

Nú. Prosesu : 0088/23.MFALS
Kompozisaun Tribunál : Singulár
Juis : Dr. Nasson Armindo Marques Sarmiento Maia
Prokurador : Dr. Simeão Brites Seixas
Defeza : Dr. Albano Maia (AP)
Desizaun : Omologa pedidu dezisténsia keixa no absolve

Iha 10 Feveiru 2025, Tribunál Judisiál Primeira Instánsia Suai prezide leitura sentensa ba krime danu simples no espésie ameasada ka ho perigu atu hotu envolve arguidu Roberto do Carmo no Marito dos Santos hasoru ofendidu Bernadino Almeida no Estadu RDTL, iha Munisípiu Manufahi.

Akuzasaun Prokurador

Prokurador akuza katak iha 09 Setembru 2023, iha oras tuku 24:00 kalan, arguidu na'in rua ho sira nia kolega FDTL rua seluk ba iha ofendidu nia karau luhan iha mota kelen hodi tiru ofendidu nia karau timor inan ida. Alende tiru ofendidu nia karau, arguidu sira

mós tiru mate rusa fuik rua. Konsekuensia hosi arguidu sira nia hahalok ne'e ofendida hetan prejuizu ho valór osan US\$800.00.

Prokuradór akuza arguidu sira kontra artigu 258 KP kona-ba danu simples ho moldura penál to'o tinan 3 ka multa no artigu 218 KP kona-ba espésie amesada ka ho perigu atu hotu ho moldura penal to'o tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun ba kazu krime sira ho natureza semi-públiku, nune'e antes tama ba julgamentu produsaun ba prova, juis husu ba parte sira atu halo tentativa konsiliaun. Iha prosesu tentativa konsiliaun ne'e, ofendidu hakarak deziste ninia keixa hasoru arguidu sira maibé ho kondisaun katak arguidu sira tenke selu fali karau ne'ebé sira haan no arguidu sira mós pronto atu selu maibé selu fali osan sorin de'it hosi prejuizu ne'ebé iha no ofendidu mós konkorda atu arguidu sira fó fali osan sorin US\$400.00. ba ofendidu, ho aseitasaun hosi parte rua tribunál omologa pedidu dame hosi parte rua no absolve arguidu hosi krime danu simples. Entretantu ba krime espésie amesada ka ho perigu atu hotu, tribunál kontinua ba julgamentu.

Iha prosesu julgamentu, arguidu na'in rua deklara katak momentu ne'e ba duni ho FDTL na'in rua tiru mate karau, bainhira tiru mate tiha karau FDTL na'in rua seluk mós tiru mate tiha rusa no lori mai tau iha kareta hafoin sira fila ba uma, arguidu nain rua deklara tan katak foin primeiravés mai hatan iha tribunál.

Testemuña Virgilio Tilman depoimenta katak momentu ne'eba toba hela iha ofendidu nia karau luhan no rona kilat tarutu testemuña halai ba uma fó hatene ba joven sira iha bairo laran no fó hatene kedas ba xefe aldeia depois ba hein arguidu sira iha kruzamentu estrada nian, testemuña deklara tan katak hapara tiha kareta no haree karau ida mate no rusa rua mate iha kareta laran, testemuña deklara liután katak la haree kilat iha kareta laran no la haree arguidu sira tiru rusa maibé rona de'it kilat tarutu.

Testemuña Saturnina da Silva nu'udar xefe aldeia depoimenta katak momentu ne'eba testemuña Virgilio Tilman fó hatene katak arguidu sira tiru rusa no karau no testemuña organiza joven sira iha bairo laran ba hein arguidu sira iha estrada kruzamentu nian no bainhira arguidu sira to'o, sira hapara tiha kareta no haree rusa rua mak mate iha kareta laran no karau ida, testemuña deklara katak la haree kilat iha kareta laran no laharee arguidu sira mak tiru mate maibé haree de'it mak rusa no karau mate iha kareta laran.

Alegasaun finál

Prokuradór haktuir katak iha julgamentu ne'e arguidu deklara katak ba duni ho membru FDTL na'in rua seluk ba tiru karau tanba arguidu Roberto do Carmo mak husu ajuda no arguidu Marito bolu duni membru FDTL sira tugas iha ne'eba ba hotu no FDTL na'in rua seluk mak tiru mate rusa no testemuña sira depoimenta katak sira haree duni karau mate no rusa rua mate iha arguidu nia kareta maibé testemuña sira mós laharee

arguidu sira tiru rusa no karau no laharee arguidu sira nia kilat, ho razaun hirak ne'e husu ba tribunál atu deside tuir konviksaun tribunál nian.

Entretantu, defeza haktuir katak iha julgamentu la iha testemuña ida haree katak arguidu sira mak tiru rusa maibé testemuña sira ne'e rona de'it kilat tarutu no haree karau no rusa mate iha kareta laran, defeza intende katak lei biodiversidade mós defini kona-ba animal sira ne'ebé tama iha kategoria protezida, ezemplu seluk comunidade balun kesi hela rusa fuik ida iha ministériu públiku nia edifisiu, se animal sira ne'e protezidu sira nia fatin laos iha ne'eba maibé iha ai-laran ne'eba, defeza hanoin katak la nesesariu atu kondena arguidu sira tanba ne'e husu ba tribunál atu absolve arguidu sira hosi krime ne'e.

Desizaun

Depoisde avalia faktu hotu, tribunál konsidera faktu iha akuzasaun prokuradór nian la provadu hotu tanba laos arguidu sira mak tiru rusa, maibé arguidu Marito dos Santos nia membru mak tiru rusa. Bazeia ba faktu la provadu hirak ne'e tribunál konklui prosesu ne'e no absolve arguidu sira hosi krime refere.

3. Krime kontrabandu

Nú. Prosesu	: 0042/19.BBATB
Kompozisaun Tribunál	: Kolektivu
Juis	: Dr. Hugo da Cruz Pui, Dra. Patricia Xavier Fatima no Dr. Samuel da Costa Pacheco
Prokuradór	: Dr. Rafael Jeronimo Gusmão
Defeza	: Dr. Jonas Henrique da Costa
Desizaun	: Pena multa US\$120.00

Iha 18 Feveireiru 2025, Tribunál Judisiál Primeira Instánsia Suai, prezide leitura akordaun ba krime kontrabandu ne'ebé envolve arguida Filomena Tavares Gonçalves hasoru Estadu RDTL, iha Munisípiu Bobonaro.

Akuzasaun Prokuradór

Prokuradór akuza katak iha 31 Marsu 2019, iha oras la apura, Polísia Eskuadra Atabae halo auto stop ba iha transporte públiku iha Atabae nune'e hapara bis ho naran Maharani no haree hetan minarai, no minarai sira ne'e pertense ba iha arguida nian no minarai sira ne'e arguida sosa iha Merkadu Balibo. Arguida sosa minarai 35 litru ho valor osan US\$27.00. Konsekuensia hosi arguida ninia hahalok ne'e Estadu Timor-Leste hetan prezuiju.

Prokuradór akuza arguidu kontra artigu 316 KP kona-ba kontra bandu ho moldura penál tinan 2 to'o tinan 6 prizaun ka multa.

Produsaun ba prova sira

Iha prosesu julgamentu, arguida konfesa faktu hotu iha akuzasaun no deklarara katak antes ne'e mai hatan ona iha tribunál ho kazu ne'ebé hanesan, arguida deklarara tan katak sosa minarai hodi faan no selu ba oan sira nia eskola, arrepende ninia hahalok no

depoisde akontesimentu ne'e arguida la repete ona ninia hahalok. Arguida hanesan ema agrikultór, la iha rendimentu ne'ebé fiksi.

Alegasaun finál

Prokuradór haktuir katak, arguida konfesa totál ba faktu hotu iha akuzasaun, prokuradór haree katak krime kontrabandu ne'e aas tebes tanba ne'e husu ba tribunál atu kondena arguidu tuir artigu 316 KP.

Alende ne'e, defeza haktuir katak iha julgamentu arguida konfesa no depoisde akontesimentu la komete ona krime, arguida deklarara katak minarai ne'e hodi faan no atu selu ba oan sira nia eskola, tanba ne'e husu ba tribunál atu kondena arguida ho pena multa.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu hirak ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguida ho pena multa US\$120.00 ne'ebé kada loron arguida sei selu US\$1.00 durante loron 120. Tribunál mós fiksa pena alternativa, durante loron 80 prizaun, bainhira arguida la selu pena multa refere.

4. Krime ofensa ba integridade física simples ho natureza violénsia doméstika

Nú. Prosesu : 0012/24.CVMCT
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Simeão Brites Seixas
Defeza : Dr. Angelmo Pinto
Desizaun : Pena prizaun fulan 6 suspende ba tinan 1

Iha 18 Fevereiro 2025, Tribunál Judisiál Primeira Instánsia Suai prezide leitura sentensa ba krime ofensa ba integridade física simples ho natureza VD ne'ebé envolve arguida AdS hasoru nia la'en, iha Munisípiu Covalima.

Akuzasaun Prokuradór

Prokuradór akuza katak iha 15 Juñu 2024, iha oras tuku 10:30 dadeer, arguida foti fatuk tuku dala ida iha ofendidu nia ulun rezulta kanek. Antes agresaun ne'e, ofendidu husu ba arguida atu ba vizita ofendidu nia inan ne'ebé moras iha foho, maibé arguida la autoriza nune'e arguida ho ofendidu diskute malu no mosu agresaun ne'e.

Prokuradór akuza arguida kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu arguida hili direitu nonook.

Entretantu, ofendidu kontinua konfirma faktu hotu iha akuzasaun no deklarata katak depoisde akontesimentu di'ak malu kedas no nafatin moris hamutuk hanesan feen ho la'en iha uma ida.

Alegasaun finál

Prokuradór konsidera arguidu provadu komete krime hasoru ofendida, mezmua iha julgamentu arguida hili direitu nonook, maibe ofendida kontinua konfirma faktu hotu iha akuzasaun, tanba ne'e husu ba tribunál atu kondena arguida ho pena prizaun suspende ninia ezekusaun.

Entretantu, defeza husu ba tribunál atu kondena arguida tuir konviksaun tribunál nian.

Desizaun

Depoisde avalia faktu hotu, tribunál prova katak arguida foti fatuk tuku dala ida iha ofendidu nia ulun rezulta moras no kanek.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguida ho pena prizaun fulan neen suspende ba tinan ida.

5. Krime abuzu seksuál ba ema ne'ebé labele reziste

Nú. Prosesu : 0003/24.MFALS
Kompozisaun Tribunál : Koletivu
Juis : Dr. Naason Mario Armindo Marques Doutel, Dr. Hugo da Cruz Pui no Dra. Patricia de Araujo F. B. M. Xavier
Prokuradór : Dr. Simeão Brites Seixas
Defeza : Dr. Jonas Henrique da Costa
Desizaun : Absolve

Iha 18 Fevereiro 2025, Tribunál Judisiál Primeira Instánsia Suai, prezide leitura akordaun ba krime abuzu seksuál ba ema ne'ebé labele reziste ne'ebé envolve arguidu COF hasoru ofendida ho idade (tinan 60), iha Munisípiu Manufahi.

Akuzasaun Prokuradór

Prokuradór akuza katak iha 25 Janeiro 2024, iha oras tuku 22:00 kalan, arguidu ba iha ofendida nia uma hodi loke odamatan tama ba uma laran ba liu iha ofendida nia kuartu laran hodi fanu ofendida no hatete ba ofendida katak "*atu halo relasaun seksuál*", nune'e arguidu hasai ofendida nia roupa no arguidu mós hasai nia roupa hodi halo relasaun seksuál ho ofendida. Arguidu halo relasaun seksuál ho ofendida laos foin dala ida maibe bebeik ona hamutuk dala haat. Arguidu hatene katak ofendida ema ne'ebé ho kondisaun defisiénsia fiziku, maibe arguidu aproveita kondisaun ofendida nian hodi prátika aktu seksuál hasoru ofendida.

Prokuradór akuza arguidu kontra artigu 179 KP kona-ba abuzu seksuál ba ema ne'ebé la bele reziste ho moldura penal tinan 4 to'o tinan 12.

Produsaun ba prova sira

Iha prosesu julgamentu, arguidu konfesa faktu sira hotu iha akuzasaun no deklarata katak relasaun seksuál ne'e akontese, tanba hakarak no hakarak. Arguidu mós deklarata katak kazu ne'e sira rezolve ona no di'ak malu ona, arguidu fó sala ofendida ho osan US\$250,00, fahi ida ho folin US\$400,00, tais feto ida, fos saku ida no mina litru 5 ba ofendida, arguidu mós deklarata liután katak foin mak mai hatan iha iha tribunál, arguidu ema agrikultór la iha rendimentu ne'ebé fiksi kada fulan.

Alende ne'e, ofendida kontinua konfirma faktu hotu iha akuzasaun no deklarata katak relasaun seksuál ne'e akontese tanba hakarak ho hakarak, ofendida deklarata liután katak kazu ne'e sira rezolve ona tuir família no di'ak malu ona no arguidu fó ona sala ba ofendida hanesan arguidu ninia deklarasaun.

Alegasaun finál

Prokuradór haktuir katak, arguidu konfesa faktu sira iha akuzasaun no konfirma mós hosi ofendida katak relasaun seksuál ne'e akontese hakarak no hakarak la iha obligasaun tanba ne'e husu ba tribunál atu deside tuir konviksaun tribunál nian.

Alende ne'e, defeza haktuir katak iha julgamentu ne'e arguidu konfesa faktu hotu katak halo duni relasaun seksuál ho ofendida maibé relasaun seksuál ne'e akontese tanba hakarak ho hakarak no ofendida mós konfirma katak relasaun seksuál ne'e akontese tanba hakarak ho hakarak, defeza hanoin katak krime ne'ebé dun ba arguidu ne'e la priense elementu hosi krime iha artigu 179 KP nian, nune'e husu ba tribunál atu absolve arguidu hosi krime ne'e.

Desizaun

Depoisde avalia faktu hotu, tribunál konsidera faktu hotu iha akuzasaun prokuradór nian la provadu tanba relasaun seksuál ne'e akontese hakarak ho hakarak.

Bazeia ba faktu la provadu hirak ne'e tribunál konklui prosesu ne'e hodi absolve arguidu hosi krime ne'e.

6. Krime ofensa ba integridade física simples ho natureza violência doméstica

Nú. Prosesu	: 0024/24.CVMCT
Kompozisaun Tribunál	: Singulár
Juis	: Dra. Patricia de Araujo F. B. M. Xavier
Prokuradór	: Dr. Simeão Brites Seixas
Defeza	: Dr. Angelmo Pinto

Desizaun : Pena multa US\$45.00

Iha 18 Feveireiru 2025, Tribunál Judisiál Primeira Instánsia Suai, prezide leitura sentensa ba krime ofensa ba integridade fízika simples ho natureza VD ne'ebé envolve arguidu RdO hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 27 Outubru 2024, iha oras tuku 8:00 dadeer, arguidu kaer ofendida nia fuuk hodi rasta no tuku dala ida iha ofendida nia matan parte loos, buti iha kakorok, halo kanek ofendida nia hirus matan no tebe dala ida iha ofendida nia kotuk laran rezulta ofendida monu ba rai. Antes agresaun ne'e, arguidu ho ofendida diskute malu kona-ba arguidu lakohi ba toos.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, foin mak mai hatan iha tribunál, arrepende ninia hahalok, arguidu deklara mós katak depoisde akontesimentu liu loron rua di'ak malu fali no depoisde akontesimentu ne'e to'o agora larepete hahalok hanesan hasoru ofendida.

Depoisde rona tiha deklarasaun arguidu nian, prokuradór husu ba tribunál atu presinde ofendida nia deklarasaun tanba prova sufisiénte ona. Parte defeza konkorda ho pedidu ne'e, nune'e tribunál presinde deklarasaun ofendida nian.

Alegasaun finál

Prokuradór konsidera arguidu provadu komete krime hasoru ofendida, nune'e husu ba tribunál atu kondena arguidu ho pena multa.

Entretantu, defeza haktuir katak, arguidu konfesa faktu sira iha akuzasaun, arrepende nia hahalok, foin mai hatan iha tribunál tanba ne'e husu ba tribunál atu kondena arguidu tuir konviksaun tribunál nian.

Desizaun

Depoisde avalia faktu sira hotu, tribunál konsidera faktu hotu iha akuzasaun prokuradór nian provadu hotu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0,50 sentavus kada loron, durante loron 90. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

7. Krime ofensa ba integridade física simples

Nú. Prosesu : 0005/24.CVSUI
Kompozisaun Tribunál : Singulár
Juis : Dra. Patricia de Araújo F. B. M. Xavier
Prokuradór : Dr. Nelson J.S. Magno
Defeza : Dr. Jonas Henrique da Costa
Desizaun : Omologa pedidu dezisténsia keixa

Iha 20 Feveiru 2025, Tribunál Judisiál Primeira Instáncia Suai prezide julgamentu tentativa konsiliaun ba krime ofensa ba integridade física simples ne'ebé envolve arguidu JRA no DM hasoru ofendida JIdF, iha Munisípiu Covalima.

Akuzasaun Prokuradór

Prokuradór akuza katak iha 20 Agostu 2024, iha oras tuku 13:00 meiodia, arguidu na'in rua rasta ofendida nia fuuk ba mai rezulta moras no arguidu DM basa dala ida iha ofendida nia hasan parte karuk rezulta moras.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa.

Produsaun ba provas sira

Bazeia ba artigu 262 nú(2) KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun antes tama ba julgamentu.

Iha prosesu tentativa konsiliaun ne'e, ofendida hakarak dezisté tiha nia keixa maibé ho kondisaun katak arguidu na'in rua tenke fó osan transporte nian, arguidu na'in rua mós konkorda no promete iha futuru sei lakomete tan krime hasoru ofendida no ema seluk no arguidu na'in rua mós husu diskulpa ba ofendida iha sala audénsia nia laran.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa dame ne'e.

Dezisaun

Bazeia ba akordu dame hosi parte rua no pedidu dezisténsia keixa hosi ofendida, tuir artigu 262 nú 2 KPP, tribunál konklui prosesu ne'e no omologa akordu dame ne'e.

8. Krime koasaun seksuál

Nú. Prosesu : 0142/23.PDSUA
Kompozisaun Tribunál : Koletivu
Juis : Dr. Hugo da Cruz Pui, Dr. Samuel da Costa Pacheco no
Dra. Patricia de Araujo F. B. M. Xavier
Prokuradór : Dr. Rafael Jeronimo Gusmão

Defeza : Dr. Albano Maia
Desizaun : Pena prizaun tinan 5 fulan 4

Iha 21 Feveireu 2025, Tribunál Judisiál Primeira Instánsia Suai, prezide leitura akordaun ba krime koasaun seksuál ne'ebé envolve arguidu AM hasoru ofendida nu'udar fetu foun, iha Munisípiu Ainaro.

Akuzasaun Prokuradór

Prokuradór akuza katak iha 10 Dezembru 2023, iha oras tuku 9:00 dadeer, arguidu atu kous ofendida nia oan, ofendida mós fó nia oan ba arguidu no arguidu aproveita hodi buti ofendida nia susun parte loos, ofendida sente moras hodi baku sai kedas arguidu nia liman. Arguidu nia aktu ne'e rezulta ofendida sente moe no triste.

Prokuradór akuza arguidu kontra artigu 171 KP kona-ba koasaun seksuál ho moldura penal tinan 2 to'o tinan 8 prizaun.

Produsaun ba prova sira

Iha prosesu julgamentu, arguidu deklarata katak momentu ne'eba arguidu ba foti au atu halo lutu no fila ba uma haree bei-oan tanis nune'e arguidu kous tiha hosi ofendida nia liman, arguidu deklarata katak la buti ofendida nia susun liman kona de'it mós laiha, arguidu deklarata liután katak hamaus nia bei-oan durante 15 minutus hanesan ne'e mak foin bei-oan nonook no fó fali ba ofendida kous, arguidu kontinua ba foti au iha toos. arguidu mós deklarata katak problema ho nia fetu foun iha tanba fetu foun amante ho mane seluk no arguidu ba rezolve no fila uma hase ofendida atu la bele repete ninia hahalok, ho nune'e ofendida bobar lia falsu hodi kesar arguidu.

Entretantu, ofendida kontinua konfirma faktu iha akuzasaun no deklarata katak momentu ne'eba kous nia oan no tein iha dapur maibé arguidu fila hosi toos atu kous no ofendida fó ninia oan ba arguidu maibé arguidu aproveita buti ofendida nia susun no ofendida sente moras nune'e ofendida kous fali nia oan no baku ses tiha arguidu nia liman no kous nia oan halai sai hosi uma ba banin boot nia uma hodi telefone ninia maun no ofendida fila ba ninia uma, ofendida deklarata tan katak momentu ne'eba ofendida nia oan latanis no iha akontesimentu ne'e ofendida nia la'en iha hela toos.

Alegasaun finál

Prokuradór haktuir katak, mezmú iha julgamentu arguidu nega faktu hotu, maibé ofendida konfirma faktu hotu iha akuzasaun, prokuradór haree katak arguidu nia aktu ne'e priense elementu krime tuir artigu 171 KP kona-ba koasaun seksuál, tanba ne'e husu ba tribunál atu kondena arguidu ho pena prizaun tinan 2 suspende ba tinan rua.

Entretantu, defeza haktuir katak iha julgamentu arguidu deklarata katak momentu ne'eba fila hosi toos haree bei-oan tanis nune'e ba kous bei-oan hosi ofendida nia liman no arguidu la buti ofendida nia susun, nune'e defeza konsidera arguidu nia aktu ne'e la priense element hosi krime tuir artigu 171 KP, tanba ne'e husu ba tribunál atu absolve arguidu hosi krime ne'e.

Desizaun

Depoisde avalia faktu hotu, tribunál koletivu halo alterasaun substansiál hosi krime koasaun seksuál, ba fali krime koasaun seksuál ho agravasaun hosi artigu 173 KP no artigu 182 KP, tanba ofendida nu'udar arguidu nia feto foun.

Depoisde avalia faktu hotu, tribunál prova katak arguidu ho intensaun kaer no buti ofendida nia orgaun susun.

Bazeia ba faktu provadu hirak ne'e no tetu mós ho sirkunstánsia atenuante no agravante sira ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan lima fulan haat.

9. Krime koasaun seksuál

Nú. Prosesu : 0010/24.MFSIC
Kompozisaun Tribunál : Koletivu
Juis : Dr. Nasson Armindo Marques Doutel Sarmento Dr. Hugo da Cruz Pui no Dra. Patricia de Araujo F. B. M. Xavier
Prokuradór : Dr. Simeão Brites Seixas
Defeza : Dr. Jonas Henrique da Costa
Desizaun : Pena prizaun tinan 7

Iha 21 Feveireiru 2025, Tribunál Judisiál Primeira Instánsia Suai, prezide leitura akordaun ba krime koasaun seksuál ne'ebé envolve arguidu ABMC hasoru ofendida, iha Munisípiu Manufahi.

Akuzasaun Prokuradór

Prokuradór akuza katak iha 15 Abril 2024, iha oras tuku 11:00 dadeer, aguidu ba iha ofendida nia uma ho objetivu atu kura ofendida nia moras raan mutin, bainhira arguidu to'o iha ofendida nia uma, arguidu ho ofendida tama ba kuartu laran, arguidu hahú kumu ofendida nia liman rua, kabaas no buti ofendida nia susun rua.

Tuir mai iha 16 Abril 2024, iha oras tuku 9:00 dadeer, arguidu nafatin iha ofendida nia uma hodi kura ofendida nia moras, arguidu ho ofendida tama ba kuartu laran atu kura ofendida nia moras maibé arguidu hasai ofendida nia sutian hodi buti ofendida nia susun rua, depois arguidu hasai ofendida nia roupa no haruka ofendida loke nia kelen rua arguidu lori liman kokir ofendida nia orgaun sensitivu to'o raan mutin sai, la to'o iha ne'e de'it arguidu kontinua lori nanal lambe ofendida nia orgaun sensitivu kuaze minutu 1 no kumu ofendida nia kelen rua. Konsekuénsia hosi arguidu nia aktu ne'e rezulta ofendida senti moe no triste.

Prokuradór akuza arguidu kontra artigu 171 KP kona ba koasaun seksuál ho moldura penal tinan 2 to'o tinan 8.

Produsaun ba prova sira

Iha prosesu julgamentu, arguidu deklara katak momentu ne'eba ofendida nia inan aman mak bolu arguidu atu kura ofendida nia moras no arguidu esplika kona-ba regra kura moras nian ba ofendida nia inan aman inklui ofendida, ofendida ho nia inan aman konkorda nune'e arguidu ho ofendida tama ba kuartu laran hodi hasai ofendida nia faru no sutiaun arguidu tafui kaben ba ofendida nia hirus matan dudu tun mak liman kona ofendida nia susun.

Arguidu deklara katak loron tuir fali mai arguidu nafatin ba iha ofendida nia uma hodi kura ofendida nia moras ho maneira arguidu ho ofendida tama ba kuartu laran arguidu hahú hasai ofendida nia rupa tafui kaben ba ofendida nia hirus matan no dudu tun ba kabun no haruka ofendida hasai nia rupa, arguidu haruka ofendida loke kelen depois arguidu hatama liman ba ofendida nia orgaun sensitivu hodi kokir sai raan mutin no arguidu kontinua supa sai ofendida nia raan mutin, arguidu deklara liután katak kura ema nia moras ne'e barak loos ona ema sira ne'e mai hosi munisípiu seluk mós, arguidu deklara liután katak kura ofendida nia moras ne'e dala tolu foin kasu no moras ne'e di'ak, maibé foin kura dala rua no atu ba datolu ofendida lakohi ona, arguidu deklara mós katak foin mak mai hatan iha tribunál.

Alende ne'e, ofendida kontinua konfirma faktu iha akuzasaun no deklara katak momentu ne'eba ofendida ho nia inan atu ba ospital ho objetivu atu kura nia moras no hasoru malu ho arguidu iha dalan mak arguidu husu ofendida nia inan atu ba ne'ebé ofendida nia inan hatan lori ofendida ba ospital kura moras raan mutin, arguidu mós kontinua husu *"imi faan karau ka lae maibé ofendida nia inan dehan karau la iha no vijijñu mak faan nia karau"*, ofendida ho nia inan no arguidu fila ba uma no to'o iha uma arguidu dehan hatene kura moras raan mutin, ofendida deklara katak arguidu la esplika kona-ba regra kura moras nian, arguidu tafui kaben de'it maibé la mama ai-moruk ruma, ofendida deklara katak momentu ne'eba arguidu hatama liman ba ofendida nia orgaun sensitivu laran kokir sai raan mutin ne'e tuir loloos ofendida lakohi, maibé tanba atu kura moras nune'e ofendida tuir deit, ofendida deklara liután katak depoisde akontesimentu dala rua, ofendida deskonfia ona arguidu nune'e depoisde arguidu kura ofendida, ofendida telefone ba nia bin hodi informa katak *"arguidu ne'e bai bain kura moras hanesan ne'e ka lae"*, ofendida nia bin hatan katak *"la kuñese arguidu"*. Iha loron tuir mai ofendida nia aman telefone arguidu atu rezolve problema ne'e maibé arguidu la ba tanba ne'e ofendida nia aman ba hato'o keixa iha polisia.

Alegasaun finál

Prokuradór haktuir katak arguidu konfesa no konfirma hosi ofendida, maibé kazu ne'e estrainu oituan tanba foin primeiravés rona ema kura moras ho maneira hanesan arguidu halo ne'e, durante ne'e rona iha munisípiu Manufahi ne'e kura ema tohar sira no nunca rona ema kura moras raan mutin, prokuradór konsidera arguidu aproveita ofendida ho maneira hanesan hodi estraga ofendida, tanba ne'e husu ba tribunál ba konkursu krime rua ne'e atu kondena arguidu ho pena efetiva tinan haat prizaun.

Entretantu, defeza haktuir katak iha julgamentu arguidu deklara katak kura moras ho maneira mak hanesan ne'e no arguidu esplika mós regra kura moras nian ba ofendida tanba ne'e husu ba tribunál atu tetu no fó justisa ne'ebé justu ba arguidu.

Desizaun

Iha desizaun ne'e tribunál halo alterasaun kualifikasaun jurídiku hosi artigu 171 KP kona-ba koasaun seksuál ba fali artigu 172 KP kona-ba violasaun seksuál, tanba tribunál konsidera arguidu nia aktu ne'e priense elementu hosi krime violasaun seksuál.

Depoisde avalia faktu hotu, tribunál prova katak arguidu komete aktu krime violasaun seksuál hasoru ofendida. Bazeia ba faktu prova hirak ne'e no tetu mós ho sirkunstánsia atenuante katak arguidu foin mak mai hatan iha tribunál no sirkunstánsia agravante katak arguidu la iha estudu kona-ba saúde nian no primeiravés arguidu kura ema ho maneira hanesan ne'e, tanba ne'e tribunál konklui prosesu ne'e no kondena arguidu kada krime tinan lima prizaun no tribunál halo akumulasaun ba pena hodi kondena arguidu ho pena únika tinan hitu prizaun.

10. Krime abuzu seksuál ba menór

Nú. Prosesu : 0002/24.MFSIC

Kompozisaun Tribunál : Koletivu

Juis : Dr. Nasson Armindo Marques Doutel Sarmiento Dr. Hugo da Cruz Pui no Dra. Patricia de Araujo F. B. M. Xavier

Prokuradór : Dr. Simeão Brites Seixas

Defeza : Dr. Jonas Henrique da Costa

Desizaun : Pena prizaun tinan 5

Iha 21 Feveiriu 2025, Tribunál Judisiál Primeira Instánsia Suai prezide leitura akordaun ba krime abuzu seksuál ba menór ne'ebé envolve arguidu CSN hasoru namorada ho idade (tinan 13), iha Munisípiu Manufahi.

Akuzasaun Prokuradór

Prokuradór akuza katak iha loran la apura maibé iha fulan Dezembru 2023, iha oras tuku 19:00 kalan, arguidu ho ofendida kontaktu malu liuhosi telefone atu hasoru malu, nune'e arguidu ho ofendida consege hasoru malu no arguidu ho ofendida lori malu tama ba uma mamuk laran, arguidu ho ofendida hahú rein malu, arguidu kaer ofendida nia susun rua, arguidu hakarak halo relasaun seksuál ho ofendida no ofendida mós aseita nune'e ofendida ho arguidu halo relasaun seksuál.

Liu tiha semana rua depoisde akontesimentu primeiru arguidu ho ofendida kontinua hasoru malu iha fatin hanesan, hodi halo tan relasaun seksuál ho maneira ne'ebé hanesan akontesimentu antes.

Prokuradór akuza arguidu kontra artigu 177 KP kona-ba abuzu seksuál ba menór ho moldura penál tinan 5 to'o tinan 20.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak ho ofendida iha relasaun namorada, arguidu deklara katak iha akontesimentu ne'e arguidu tinan 16 fulan tolu, arguidu hanesan estudante foin mai hatan iha tribunál.

Alende ne'e, ofendida kontinua konfirma faktu iha akuzasaun no deklara katak iha akontesimentu ne'e ofendida nia idade tinan 13, ofendida deklara katak ho arguidu iha relasaun namorada to'o agora mós sei namora.

Alegasaun finál

Prokuradór haktuir katak, iha julgamentu arguidu konfesa faktu sira iha akuzasaun no konfirma mós hosi ofendida, mezmu arguidu ho ofendida hakarak ho hakarak maibé ofendida nia tinan seidak to'o, tanba ne'e husu ba tribunál ba krime konkursu rua ne'e tribunál kondena arguidu kada krime ho pena prizaun tinan lima no husu ba tribunál kondena arguidu ho pena únika tinan neen prizaun.

Entretantu, defeza haktuir katak arguidu konfesa faktu sira iha akuzasaun no arguidu ho ofendida sei namora no arguidu mós sei estudante no bazeia ba artigu 55 KP kona-ba sirkunstánsia atenuante jerál husu ba tribunál atu fó pena ne'ebé adekua ba arguidu.

Desizaun

Depoide avalia faktu sira hotu, tribunál konsidera akuzasaun prokuradór nian provadu hotu.

Bazeia ba faktu prova sira ne'e no tetu mós ho sirkunstánsia atenuante katak arguidu ho ofendida momentu ne'eba iha relasaun namorada, arguidu estudante, konfesa faktu no foin mak mai hatan iha tribunál, nune'e tribunál konklui prosesu no kondena arguidu kada krime tinan lima no tribunál halo akumulasaun ba pena hodi kondena arguidu hp pena únika tinan lima prizaun.

11. Krime ofensa ba integridade fízika simples ho natureza violénsia doméstika no krime ameasa

Nú. Prosesu : 0068/24.CVSUI
Kompozisaun Tribunál : Singulár
Juis : Dr. Nasson Mario Armindo Maques Doutel Sarmiento

Prokuradór : Dr. Nelson J.S. Magno
Defeza : Dr. Angelmo Pinto
Desizaun : Pena multa US\$60.00

Iha 21 Feveiriu 2025, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples ho natureza VD ne'ebé envolve arguidu CM hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 24 Setembru 2024, iha oras tuku 13:00 meiodia, arguidu basa dala ida iha ofendida nia hasan parte loos kauza moras.

Tuir mai iha 06 Outubru 2024, iha oras tuku 16:00 lokraik, arguidu ba iha ofendida nia uma, hodi ameasa ofendida katak *“se lakohi hau, hau sei oho mate tiha ó*. Arguidu nia aktu ne'e rezulta ofendida sente ta'uk ho arguidu nia ameasa. tanba depoisde akontesimentu primeiru ofendida ba hela tiha ho ninia família

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3 (a), 35 (b) no 36 LKVD no artigu 157 KP kona-ba krime ameasa ho moldura penál to'o tinan 2 ka multa.

Produsaun ba prova sira

Iha prosesu julgamentu, arguidu deklara katak faktu balun loos no balun la loos, arguidu rekuñese basa dala ida iha ofendida nia hasan, maibé ba faktu kona-ba ameasa ofendida ne'e la loos, arguidu deklara foin mak mai hatan iha tribunál arrepende ninia hahalok, promete sei la komete krime hasoru ofendida, arguidu deklara katak separa ona ho ofendida.

Alende ne'e, ofendida kontinua konfirma faktu iha akuzasaun no deklara katak depoisde akontesimentu sente ba mai di'ak hela ba merkadu mós di'ak hela ba igreja mós di'ak hela, ofendida mós deklara katak moris separa ho arguidu tinan ida resin ona.

Alegasaun finál

Prokuradór haktuir katak, iha julgamentu arguidu konfesa parsial ba faktu iha akuzasaun, maibé ofendida kontinua konfirma faktu hotu iha akuzasaun, nune'e konsidera arguidu nia aktu ne'e priense elementu krime ne'ebé akuza ba arguidu, tanba ne'e husu ba tribunál atu kondena arguidu tuir konviksaun tribunál nian.

Alende ne'e, defeza haktuir katak, iha julgamentu arguidu deklara katak basa duni dala ida iha ofendida nia hasan maibé la ameasa ofendida, no ofendida mós deklara katak durante ne'e senti seguru hela, tanba ne'e husu tribunál atu deside tuir konviksaun tribunál nian.

Desizaun

Depoisde avalia faktu sira hotu, tribunál prova katak arguidu basa dala ida iha ofendida nia hasan, entretantu kona-ba krime ameasa tribunál konsidera la provadu.

Bazeia ba faktu provadu no la provadu hirak ne'e no tetu mós sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>